

თბილისის “დინამოს” ფეხბურთელთა გუნდის გამარჯვება

გუშინ ლ. პ. ბერიას სახელობის თბილისის “დინამოს” სტადიონზე ერთმანეთს შეხვდნენ ჩვენი ქვეყნის უძლიერესი გუნდები – 1945 წლის ჩემპიონი მოსკოვის “დინამო” და თბილისის “დინამო”.

ეს შეხვედრა მეტად საპასუხისმგებლო იყო. შარშან მოსკოვის “დინამომ” მთელი თამაში ბრწყინვალედ ჩაატარა. ერთადერთი დამარცხება მან განიცადა მოსკოვის წითელი არმიის ცენტრალური სახლის გუნდისაგან, რომელიც ჩემპიონს მხოლოდ ერთი ქულით ჩამორჩა. ყველას ახსოვს მოსკოველთა ტრიუმფი ფეხბურთის ქვეყანაში – ინგლისში. მათ დაამარცხეს დიდი ბრიტანეთის უძლიერესი გუნდი “არსენალი”, ფრედ დამთავრეს შეხვედრა გლაზგოს გუნდთან; გლაზგო კი ბრიტანეთში “ფეხბურთის უმაღლესი კლასის ქალაქად” ითვლება.

ფეხბურთის მოყვარულთ ახსოვთ შარშანდელი შეხვედრა ამავე სტადიონზე... მსაჯმა არ ჩათვალა თბილისელების მიერ გატანილი ერთი ბურთი და ამის გამო მოგება მოსკოველებს დარჩათ ანგარიშით 2:1.

ყოველივე ეს აცხოველებს ინტერესს ამ თამაშისადმი.

სრულ 6 საათზე საკავშირო კატეგორიის ლენინგრადელი მსაჯი ავერკინი ორი მოსკოველი დამხმარე მსაჯის თანხლებით გამოდის მოედანზე. გამოდიან გუნდებიც... მათ კარგად იცნობენ მაყურებლები – აქ არის მოსკოველთა სახელმოხვეჭილი მეკარე ხომიჩი, რომელსაც ინგლისელებმა “ვეფხვი” შეარქვეს, თავდაცვის ცენტრი სემიჩასნი, თავდამსხმელები ტროფიმოვი, ბესკოვი, ს. სოლოვიოვი. თბილისელთა გუნდს მეთაურობს ბორის პაიჭაძე – ეს მოუქანცველი და ყველგანმყოფი თავდამსხმელი. კართან დგას სანაია. ჩვენს გუნდშია გაგუა, ბერძენიშვილი, ხარბედია, ლოლობერიძე... გუნდები ძირითადი შემადგენლობით განლაგდნენ მოედანზე. მსაჯმა მისცა ნიშანი...

ამაღელვებელი თამაში დაიწყო. მიკროფონთან არის ფეხბურთის მატჩების ცნობილი რადიოკომენტატორი და დიქტორი ვადიმ სინიავესკი. მის ხმას ისმენენ ჩვენი ქვეყნის დედაქალაქში – მოსკოვში, უკიდურეს ჩრდილოეთსა და შორეულ აღმოსავლეთში, ბერლინსა და ბუქარესტში. სინიავესკიმ ვერც კი მოასწრო ორიოდ წინადადების გადაცემა, რომ ჩემპიონთა კარის ბაღე შეირხა და წელს პირველი ბურთი გაუსხლტა ხელიდან ხომიჩს... ეს იყო უსწრაფესი თამაში. ამის მსგავსი იშვიათად უნახავს თბილისელ მაყურებელს. პაიჭაძე ვერ შეაკავეს მოსკოველმა დამცველებმა, თვითონ სემიჩასნიმაც კი. თბილისის თავდასხმის ცენტრმა კუთხეში დარტყმული დაბალი ბურთით პირველ წუთშივე მოუპოვა გამარჯვება თავის გუნდს.

ბურთი მოედნის ცენტრშია. მოსკოველები ავითარებენ შეტევას, მაგრამ თბილისელმა თავდამსხმელებმა თამაშის ისეთი თავბრუდამხვევი ტემპი აიღეს, რომ შეუძლებელი შეიქნა მათი “ჩაკეტვა”. თამაშის დაწყებიდან ხუთიოდე წუთი გავიდა, და მოსკოველთა კარებთან შეიქმნა “ქაოსი”: ხარბედია, ანთაძე, პაიჭაძე, ლოლობერიძე მოსკოველთა საჯარიმო მოედანზე არიან. ზედიზედ ურტყამენ კარში. ამჯერად მოსკოველთა თავდამსხმელებიც მოეშველნენ დაცვას. რადიკორსკი, სემიჩასნი და სტანკევიჩი ზედ კართან ტრიალებენ, მაგრამ... რადიკორსკიმ თავისი ხელით გამოიტანა ბურთი ბადიდან.

5 წუთის შემდეგ ანგარიშია 2:0 თბილისელთა სასარგებლოდ!

თამაში თანდათან გამწვავდა. განსაკუთრებით აქტიურობენ თავდამსხმელები ბესკოვი, ს. სოლოვიოვი და ტრიფომოვი. ბურთი უფრო ხშირად ტრიალებს თბილისელთა საჯარიმო მოედანზე. თბილისელთა მოთამაშე ხელით შეეხო ბურთს. საჯარიმო დარტყმა. ურტყამს ბესკოვი... სანაიამ ვერ აიღო, თუმცა შორი მანძილიდან, მაგრამ ძლიერად დარტყმული ბურთი. ეს იყო თამაშის 26-ე წუთზე: ანგარიში 2:1 დარჩა თამაშის პირველი ნახევრის ბოლომდე.

მომავალი 45 წუთი გადაწყვეტს გამარჯვების საკითხს. მოსკოვის დინამოელებმა სწორედ მეორე ნახევარში იციან მთელი შესაძლებლობის გამოყენება, “ჩელსის” გუნდთან შეხვედრისას თამაშის დამთავრებას 20 წუთი უკლდა და ამ 20 წუთის განმავლობაში “დინამოელებმა” სამი ბურთი გაიტანეს მოწინააღმდეგის კარში. თბილისელებს მხოლოდ შეუსუსტებული თამაშით შეუძლიათ დაიმკვიდრონ გამარჯვება.

თამაშის მეორე ნახევარიც ცოცხლად დაიწყო. მოსკოველთა საჯარიმო მოედანზეა პაიჭაძე. იგი კვლავ გაუსხლტა სემიჩასნის და ისევ ძლიერად დარტყმული დაბალი ბურთი გაგზავნა მოსკოველთა კარში. ხომიჩმა შესძლო ბურთის აღება, მაგრამ ხელიდან გაუვარდა. ამ მომენტით ისარგებლა ხარბედიამ, სწრაფად მიიჭრა ბურთთან და დაარტყა. მოსკოველთა კარის ბაღეში მესამედ გაეხვია ბურთი... ეს იყო თამაშის განახლებიდან მე-3 წუთზე.

უფრო და უფრო მწვავედებოდა თამაში. არც ერთ გუნდს არ ეტყობა მოქანცვა. მოსკოველები თანდათან გადადიან შეტევაზე და სახიფათო მომენტებს ქმნიან თბილისელთა კართან. მეკარე სანაიას უხდება მეტად მძიმე ბურთების აღება.

თამაშის დამთავრებამდე 15 წუთით ადრე მოსკოველებმა კვლავ შორი მანძილიდან შესძლეს მეორე საპასუხო ბურთის გატანა. ამ შემთხვევაში სანაიას ხელი შეუშალა მისივე გუნდის დაცვამ.

თამაშის ტემპი ოდნავადაც არ ნელდება, მაგრამ დრო მიიწურა. მსაჯმა მისცა დამთავრების ნიშანი. ანგარიშია 3:2 თბილისელთა სასარგებლოდ.

თბილისის "დინამოს" გუნდმა სახელოვანი გამარჯვება მოიპოვა.

40 ათასი მაყურებელი შეუწევს იტალიის ინტერესით ადევნებდა თვალს ამ ჭეშმარიტად ოსტატურ თამაშს.

კომუნისტი 27 აპრილი, 1946 წ.